

Sekretarijat Energetske zajednice prihvatio je žalbu koju je pokrenulo Udruženje "Ekotim" čime je potvrđeno da okolinska dozvola za planiranu Termoelektranu Banovići nije u skladu s preuzetim zakonskim obavezama koje su vlasti u BiH dužne provoditi.

Sekretarijat Energetske zajednice naložio je Federalnom ministarstvu okoliša i turizma da revidira dozvolu i uskladi je s propisanim vrijednostima koje ograničavaju dozvoljeno zagađenje zraka.

Ministarstvu je također ukazano na činjenicu da je, kada su u pitanju energetske projekti, dužno poštovati i primjenjivati preuzete odredbe propisane okolišnim zakonima, saopćeno je iz "Ekotima".

Udruženje je Sekretarijatu Energetske zajednice podnijelo žalbu protiv Bosne i Hercegovine prošle godine zbog nejasnoća u vezi sa dozvoljenim graničnim vrijednostima emisije zagađujućih materija, koje su navedene u okolišnoj dozvoli za TE Banovići.

Inače, u Banovićima je planirana izgradnja termoelektrane snage 350 MW čija se izgradnja procjenjuje na 500 miliona eura.

Vlada FBiH dala je saglasnost kineskom Dongfang Electricu kao strateškom partneru za izgradnju Termoelektrane, ali još uvijek nije potpisan ugovor o kreditiranju sa kineskom bankom u kojem Vlada FBiH treba da se pojavi kao garant za realizaciju ovog projekta.

Ranije je najavljivano da bi Termoelektrana trebalo da bude puštena u pogon do kraja 2019. godine, ali je s obzirom na sadašnje okolnosti upitno da li će taj rok biti ispoštovan.

izvor: indikator.ba